

**NO. SOALAN : 040**

**DEWAN RAKYAT MALAYSIA  
PERTANYAAN LISAN**

**PERTANYAAN : LISAN**

**DARIPADA : YB. DATO' FAUZI BIN ABDUL RAHMAN  
[ INDERA MAHKOTA ]**

**TARIKH : 30 MAC 2017 (KHAMIS)**

**NO. RUJUKAN :**

**SOALAN :**

**YB. DATO' FAUZI BIN ABDUL RAHMAN [ INDERA MAHKOTA ]** minta **MENTERI SUMBER ASLI DAN ALAM SEKITAR** menyatakan langkah-langkah Kerajaan Pusat, melalui Majlis Perhutanan Negara (MPN) untuk mengawal "over logging" oleh Kerajaan-Kerajaan Negeri dan pembalok haram hingga mengakibatkan ancaman tanah runtuh serta banjir besar yang mendatangkan bahaya dan kerugian harta benda kepada rakyat jelata.

## **JAWAPAN**

Tuan Yang di-Pertua,

Majlis Perhutanan Negara (MPN) ditubuhkan dalam Mesyuarat Majlis Tanah Negara (MTN) Ke-22 pada 20 Disember 1997 untuk membolehkan Kerajaan-Kerajaan Negeri dan Kerajaan Pusat mengadakan perundingan dari semasa ke semasa supaya semua isu berkaitan dengan dasar, pentadbiran dan pengurusan perhutanan dapat diselaraskan dan diselesaikan selaras dengan kepentingan nasional. Walau bagaimanapun, Mesyuarat Ke-66 MTN pada tahun 2011 telah menggabungkan semula Majlis Perhutanan Negara dan Majlis Mineral Negara (MMN) ke dalam MTN bagi membincangkan dasar dan perundangan untuk memajukan dan mengawal penggunaan tanah bagi perkara-perkara berkaitan pentadbiran tanah, isu-isu perlombongan dan perhutanan.

Majlis Tanah Negara (MTN) diwujudkan selaras dengan Perkara 91(3) Perlembagaan Persekutuan yang menetapkan supaya mesyuarat MTN hendaklah diadakan sekurang-kurangnya sekali dalam setahun. Mesyuarat ini dipengerusikan oleh Yang Amat Berhormat Timbalan Perdana Menteri dan dianggotai oleh Menteri-Menteri Besar. MPN telah menetapkan instrumen kawalan penting bagi mengawal pembalakan melalui penetapan Catuan Tebangan Tahunan (CTT). CTT merupakan keluasan hutan pengeluaran di dalam Hutan Simpanan Kekal (HSK) yang boleh diusahakan dalam tempoh sesuatu Rancangan Malaysia. CTT ditetapkan dengan tujuan untuk memastikan perancangan pengurusan hutan yang teratur dan berkesan bagi mengimbangi kadar pengusahaan dengan keluasan hutan pengeluaran dalam HSK

semasa, sejajar dengan konsep pengurusan hutan secara berkekalan (*Sustainable Forest Management-SFM*) dan pengusahaan hutan yang optimum.

Setiap Negeri hanya dibenarkan untuk melaksanakan aktiviti pengusahaan hutan pada kadar CTT yang telah ditetapkan. (ii) Hanya pokok yang matang dan ditanda untuk ditebang sahaja yang boleh diusahahasil. Sementara itu, pokok-pokok yang mempunyai nilai perlindungan seperti pokok ibu, pokok buah-buahan untuk kepentingan hidupan liar dan spesies-spesies pokok yang dikategorikan sebagai Sangat Terancam, Terancam dan Jarang Ditemui (Endangered, Rare and Threatened-ERT) tidak dibenarkan untuk ditebang. Di samping itu, kawasan-kawasan yang mempunyai nilai perlindungan yang terdapat dalam kawasan pengusahaan seperti sepanjang zon penamparan sungai, kecerunan melebihi 40°, jenut hidupan liar (salt-licks) dan kawasan sensitif alam sekitar perlu dikekalkan.

Jabatan Perhutanan akan menetapkan had pengeluaran bagi setiap kawasan yang diusahasil dan had pengeluaran ini perlu dipatuhi oleh pengusaha supaya tidak berlaku pengusahaan melebihi had pengeluaran dan pelesen adalah disyaratkan supaya menyediakan Rancangan Mengusahasil Hutan sebelum lesen pengusahaan hutan dikeluarkan. Rancangan Mengusahasil Hutan hendaklah disahkan oleh Pengarah Perhutanan Negeri.

Kementerian melalui Jabatan Perhutanan Semenanjung Malaysia sentiasa komited dalam membanteras pembalakan haram. Langkah yang telah diambil termasuklah memperkemaskan mekanisma penguatkuasaan hutan melalui program *National Blue Ocean Strategy*

(NBOS) seperti 1 Malaysia *Biodiversity Enforcement Operation Network* (1MBEON) dan *Centralised Enforcement Team* (CET), penubuhan Pasukan Elit Penguatkuasaan JPSPM (*JPSPM Elite Team*) dan penggunaan teknologi dan peralatan terkini seperti *Forest Monitoring Using Remote Sensing* (FMRS), *Unmanned Aerial Vehicle* (UAV), *Geographical Information System* (GIS), *Hyperspectral sensors* dan *Global Positioning System* (GPS) semasa menjalankan aktiviti penguatkuasaan hutan dan pemantauan pencerobohan hutan.

Sekian, terima kasih

## PEMBERITAHUAN PERTANYAAN DEWAN RAKYAT

**PERTANYAAN : LISAN**

**DARIPADA : DATUK HAJI MOHD FASIAH BIN MOHD FAKEH**

**TARIKH : 30.3.2017**

**SOALAN : NO. 41**

**Datuk Haji Mohd Fasih Bin Mohd Fakeh [ Sabak Bernam ]** minta **MENTERI PENDIDIKAN TINGGI** menyatakan bilangan pelajar perubatan di semua universiti awam (UA) masa kini dan nyatakan bilangan yang mendapat bantuan kewangan termasuklah biasiswa JPA, pinjaman PTPTN dan lain-lain sumber serta nyatakan bilangan pelajar yang tidak mendapat apa-apa bantuan kewangan.

### JAWAPAN

Tuan Yang di-Pertua,

Untuk makluman Ahli Yang Berhormat, berdasarkan Statistik Pendidikan Tinggi Negara tahun 2016, bilangan enrolmen pelajar perubatan peringkat Ijazah Sarjana Muda di Universiti Awam (UA) adalah seramai 12,265 orang.

Daripada jumlah tersebut, seramai 1,443 orang pelajar telah mendapat penajaan daripada Perbadanan Tabung Pendidikan Tinggi Nasional (PTPTN). Ianya melibatkan pecahan seramai 822 orang pelajar masih meneruskan pinjaman PTPTN dan 621 orang pelajar telah membatalkan pinjaman kerana mendapat tajaan lain.